

दिनांक 29.06.2024

समय: 18.45 बजे

आकाशवाणी जयपुर-अजमेर

समाचार

- मुख्यमंत्री भजन लाल शर्मा जयपुर मांय मुख्यमंत्री रोजगार उत्सव मांय करीब पांच हजार नौजवानां ने नौकरी लागण रा कागज़ सूप्या।
- प्रधानमंत्री नरेन्द्र मोदी काल आकाशवाणी ऊं प्रसारित कर्या जावण वाळा खास कार्यक्रम **मन की बात** मांय विचार बतावेला।
- राज्यपाल कलराज मिश्र कह्यो-आजाद अर जीवंत प्रेस ही लोकतंत्र री सब ऊं मोटी ताकत।

अर

- प्रदेश रा केई जिलां मांय चोखी बिरखा-आवता तीन-चार दिन जयपुर अर भरतपुर संभाग मांय कठे-कठे भारी बारिश रा आसार।

0000

मुख्यमंत्री भजन लाल शर्मा आज सरकार रा 6 महकमां मांय नौकरी सारु चुण्यी ज्या नौजवानां ने खास कार्यक्रम रे ज़रिए नौकरी लागण रा कागज़ात दीना। जयपुर मांय राख्यी ज्या खास कार्यक्रम ऊं वीडियो कांफ्रेंस रे जरिए ज़िला स्तर माथे राख्यी ज्या कार्यक्रम ई जोड़ी ज्या। ई मौके मुख्यमंत्री कह्यो के प्रदेश रा सरकारी महकमां मांय रीता ओहदां माथे भर्ती रो कैलेंडर बणा र वां ने भर्या जावेला। वे कह्यो के मोटी तादाद मांय रीता ओहदां ने भरण सारु भर्तियां रो काम चाल रह्यो है। मुख्यमंत्री कह्यो के सरकार रीता ओहदां माथे हर महीना भर्तियां करेला।

-----

वे सरकारी कर्मचारियां ऊं प्रदेश रा कमज़ोर अर वंचित तबकां रा लोगां ने विकास री मुख्य धारा मांय लावण री कोशिश करण सारु कह्यो। मुख्यमंत्री कह्यो के नकल माफ़िया ने नी बख्शा जावेला। वे कह्यो के राज्य मांय कारखानां अर खुद रा काम-धंधां ने बधावो दियो जा रह्यो है। इण ऊं पैली उद्योग मंत्री राज्यवर्द्धन राठौड़

कह्यो के राज्य सरकार रा न्यारा—न्यारा महकमां मांय हर साल 70 हजार नौजवानां ने नौकरी दी जावेला। मुख्य सचिव सुधांश पंत कह्यो के राज्य मांय एंटी चीटिंग टास्क फोर्स बणायां पाछे नौजवानां मांय भरोसो ओजू बध्यो है। सवाईमाधोपुर मांय राखी ज्या जळसा मांय नुवा नौकरी लाग्या अढ़ाई सौ कर्मचारियां ने मुख्यमंत्री रो बधाई संदेश अर सरकारी कर्मचारियां रा कर्तव्य, दायित्व अर उम्मीदां ऊं जुड़ी किताब दीरीजी।

मुख्यमंत्री जिला स्तर माथे राखी ज्या जळसां मांय मौजूद नुवा कर्मचारियां सागे वर्चुअल तरीका ऊं बातचीत ई कीनी। टोंक मांय 382 जणां ने नौकरी लागण रा कागजात संपी ज्या। भीलवाड़ा मांय नगर परिषद रा महाराणा प्रताप सभागार मांय जिला स्तर रो मुख्यमंत्री रोजगार उत्सव कार्यक्रम राखी ज्यो। बालोतरा मांय राखी ज्या कार्यक्रम रे दौरान नुवी नौकरी लाग्या दो दो कर्मचारियां सागे मुख्यमंत्री वर्चुअल तरीका ऊं बातचीत कीनी। झुन्झुनू मांय राखी ज्या कार्यक्रम मांय 189 नौजवान सिरकत कीनी। झालावाड़ मांय राखी ज्या कार्यक्रम मांय ग्रामीण विकास अर पंचायतीराज राज्य मंत्री ओटाराम देवासी ई खास पावणा रा तौर ऊं सिरकत कीनी। बूंदी मांय व्ह्या कार्यक्रम मांय नुवी नौकरी लाग्या 248 जणां ने वेलकम किट दिया ज्या। बीकानेर मांय राखी ज्या कार्यक्रम मांय नुवा चुणी ज्या कॉ—ओपरेटिव इंस्पेक्टर दीपेन्द्र सिंह नाथावत सागे मुख्यमंत्री वर्चुअल तरीका ऊं बातचीत कीनी। डूंगरपुर मांय 440 नौजवानां ने सरकारी नौकरी लागण रा कागज संपी ज्या। कोटा मांय ऊर्जा मंत्री हीरालाल नागर रोजगार उत्सव रा जिला स्तर रा जळसा ने सम्बोधित कीना। दौसा मांय राखी ज्या कार्यक्रम मांय नुवा नौकरी लाग्या 326 कर्मचारी सिरकत कीनी। **कोटपूतली—बहरोड़, जालौर अर उदयपुर** ऊं ई ऐडा कार्यक्रम राख्या जावण रा समाचार मिल्या है।

000

किसान सम्मान निधि योजना री सरुआत रा जळसा मांय मुख्यमंत्री भजन लाल शर्मा काल दोपहरां 12 बज्यां किसानां सागे लाभार्थी संवाद कार्यक्रम मांय वीडियो कांफेंस रे ज़रिए बातचीत करेला। ओ कार्यक्रम जिला, ब्लॉक अर ग्राम पंचायत लेवल माथे राख्या जावेला।

000

प्रधानमंत्री नरेंद्र मोदी काल संवारे 11 बज्यां आकाशवाणी ऊं प्रसारित कर्या जावण वाळा खास कार्यक्रम 'मन की बात' मांय विचार बतावेला। आ हर महीना प्रसारित कर्या जावण वाळा ई कार्यक्रम री 111वीं कड़ी व्हेला। ई दफा प्रसारित कर्या जावण वाळा मन की बात कार्यक्रम री प्रधानमंत्री मोदी रा तीजा कार्यकाल री आ पहली कड़ी व्हेला। मन की बात कार्यक्रम आकाशवाणी अर दूरदर्शन रा पूरा नेटवर्क, न्यूज ऑन एआईआर वेबसाइट अर मोबाइल एप माथे सुण्यो जा सकेला। 'मन की बात' कार्यक्रम आकाशवाणी समाचार, डीडी न्यूज, प्रधानमंत्री कार्यालय अर सूचना अर प्रसारण मंत्रालय रा यू-ट्यूब चैनलां माथे ई सुण्यो जा सकेला।

000

विधानसभा रो दूजो सत्र 3 जुलाई ने सुरु व्हेला। विधानसभा सचिवालय री ओर ऊं ई सत्र ऊं जुड़ी सगळी तैयारियां पूरी कर लीरीजी है। सत्र रे दौरान विधानसभा भवन री हिफाजत रा खास इंतजामात करी ज्या है। विधानसभा अध्यक्ष वासुदेव देवनानी सत्र ऊं जुड़ी व्यवस्थावां रो जायजो लीनो।

000

आकाशवाणी समाचार जयपुर री ओर ऊं प्रादेशिक समाचार बुलेटिनां मांय तीन नुवा आपराधिक कानूनां रा बारा मांय जाग जगावण सारु श्रृंखला चलायी जा रही है। आज पेश है माली मामलां ऊं जुड्या प्रावधानां रा बारा मांय खास जाणकारी— माली अपराधां री श्रेणी मांय आपराधिक विश्वासघात, जालसाजी, हवाला लेन-देन, धोखाधड़ी अर लोगां या बैंकिंग अर वित्तीय संस्थानां सागे दगो करण री योजनावां सरीखा अपराध शामिल करी ज्या हैं। ऐडा अपराध रे कारण किण ई री मौत व्हेवण रा हालात मांय अपराधी ने मौत री सजा या उम्र कैद री सजा अर कम ऊं कम 10 लाख रूप्या रा जुर्माना री सजा दी जावेला। नुवा प्रावधानां रे जरिये घोषित अपराधियां री सम्पत्ति जब्त करी जा सकेला। भारतीय नागरिक सुरक्षा संहिता 2023 रा तैत अदालत घोषित अपराधियां री गैर मौजूदगी मांय ई मुकदमो चलायो जा सकेला।

000

राज्यपाल अर विश्वविद्यालयां रा कुलाधिपति कलराज मिश्र कह्यो है के आज़ाद अर जीवंत प्रेस लोकतंत्र री मोटी ताकत है। वे आज जयपुर मांय हरिदेव जोशी पत्रकारिता अर जनसंचार विश्वविद्यालय रा दूजा दीक्षांत समारोह मांय बोल रह्या हा। राज्यपाल विश्वविद्यालयां ऊं कृत्रिम बुद्धिमता रा ज़माना मांय भाषा रा जाणकारां अर विशेषज्ञां री मदद ऊं पत्रकारिता रा स्वस्थ मूल्यां सारु नींव रा तौर ऊं काम करण बाबत् कह्यो। वे कह्यो के पत्रकारिता रो ओ दौर चुनौती वाळो है।

वे पत्रकारिता री भणार्ई रा तैत इंसानी मूल्यां ने प्राथमिकता देता थकां आवता बगत रा पत्रकार अर जनसंचार कर्मचारी तैयार करण री ज़रुरत माथे ज़ोर दीनो। राज्यपाल डीप फेक अर मर्यादाहीन समाचारां रो जिक करता थकां कह्यो के भ्रामक समाचारां ऊं बचबा रा बारा मांय ई काम करणो चाहिजे। वे विश्वविद्यालय रो नुवो बणायी ज्यो मुख्य भवन ई ऑनलाइन तरीका ऊं जनता ने सूप्यो। राज्यपाल 94 विद्यार्थियां ने उपाधियां दीनी। वे 6 विद्यार्थियां ने सोना रा तमगा दे र ई नवाज़ा।

000

राज्य मांय सघन पल्स पोलियो टीकाकरण अभियान रा तैत चिकित्सा अर स्वास्थ्य विभाग री ओर ऊं काल पांच साल तांई उम्र रा बच्चां ने पोलियो री बीमारी ऊं बचाव री दवाई पायी जावेला। ई सारु न्यारी—न्यारी ठौड़ां पोलियो बूथ बणायी ज्या है। काल दवाई नी पीवण वाळा बच्चां ने आवता दो दिन घर—घर जा र आ दवाई पायी जावेला। ई सारु मोबाइल टीमां बणायी ज्यी है। पोलियो री दवाई पावण सारु रेल्वे टेशनां अर बस अड्डां माथे ई खास मोबाइल पार्टियां लगायी जा रही है। राष्ट्रीय पल्स पोलियो महाअभियान रा बारा मांय जाग जगावण सारु आज झालावाड़ मांय रैली निकाली ज्यी।

000

प्रदेश रा केई जिलां मांय तेज बिरखा व्हे रही है। बीकानेर, भरतपुर, नागौर अर धौलपुर मांय आज संवारे ऊं ई बारिश व्ही। धौलपुर जिला रा बाड़ी मांय आज दो घंटां तांई जोरदार मेह बरस्यो। म्हाणा नागौर खबरनवीस बतायो के वठे व्ही तेज बिरखा ऊं सड़कां माथे पाणी भेळो व्हे ग्यो।

-----

बीकानेर मांय ई आज चोखो मेह बरस्यो। जयपुर मांय हल्की बिरखा व्ही। बीकानेर, नागौर अर भीलवाड़ा मांय तेज बिरखा रा समाचार है। दूजी कानी पाली मांय आज जोरदार तावड़ा ऊं लोग परेशान रह्या।

मौसम विभाग आज जयपुर, भरतपुर, जोधपुर, बीकानेर, उदयपुर अर अजमेर संभाग मांय कठे-कठे बिरखा व्हेवण रा आसार जताया है। महकमा रे मुजब आज भरतपुर, जयपुर अर उदयपुर संभाग मांय कठे-कठे भारी अर कठे-कठे घणी जोरदार बिरखा व्हेवण रा आसार है। मौसम केन्द्र जयपुर रा निदेशक राधेश्याम शर्मा बतायो के आवता तीन-चार दिन जयपुर अर भरतपुर संभाग रा कुछ हलकां मांय तेज बारिश व्हेवण अर कठे-कठे भारी बारिश तो कुछ ठोड़ां घणी भारी बारिश व्हेवण री संभावना है। कोटा, उदयपुर, अजमेर अर बीकानेर संभाग रा कुछ हलकां मांय आवता तीन-चार दिन बिरखा चालती रेहवण री संभावना है।

000

आईसीसी टी-ट्वेंटी विश्व कप क्रिकेट रा फाइनल मुकाबला मांय आज भारत अर दक्षिण अफ्रीका बीचे मुकाबलो व्हेला। ओ मैच रात आठ बज्यां बारबाडोस मांय सरू व्हेला। भारत इंग्लैंड ने अर दक्षिण अफ्रीका अफगानिस्तान ने सेमीफाइनल मुकाबला मांय शिकस्त दे र फाइनल मांय ठौड़ बणायी है। दक्षिण अफ्रीका पहली दफा विश्व कप क्रिकेट होड़ रा फाइनल मांय पूग्यो है।

000